

吳  
中  
人  
物  
志

吳中人物志卷之十一

長洲張景春甫輯

曾孫獻翼論贊

列仙

秦

赤鬚子鄆人秦穆公主魚吏也數言鄆界災異十不  
失一好食松實天門冬石脂齒落更生髮白還黑服  
霞絕粒後往吳中十餘年莫知所之抱朴子云以其  
鬚髮皆赤故名穹窿山有赤松子采石脂即此

漢

魏伯陽吳人好道術與弟子三人入山作神丹既成  
謂其弟子曰丹雖成宜以犬嘗試之犬飛則可服乃  
與白犬斃伯陽作丹惟恐不成今既成而殺犬恐  
未當神明之意餌之將復如犬柰何弟子曰先生當  
餌之否伯陽曰吾違世路棄家而來今不得仙亦耻  
復還死生皆當餌之乃服丹入口即死弟子虞生曰  
非常人服此而死得無意乎復取丹餌之亦死餘二  
人相謂曰所以為丹者欲長生耳今乃趣死將焉用  
之不服此更得數十歲遂相與出山方為伯陽及虞  
生求木以斂二子去後伯陽即起以所服丹內死弟

子及白犬須臾皆起仙去道逢伐木者乃作手書寄謝鄉里及二弟子所作參同契五行相類其說似周易假作爻象以論作丹之意

蔡經家住吳門王遠方平既得道東欲入括蒼山過吳佳胥門蔡經家以其骨相當仙告以要言經自此尸解去十餘年忽還家容色少壯語家人曰七月七日王君當來可多作飲食以供從官經家乃借甕器作飲食百餘斛羅列庭中是日王君果來舉舍皆見遠引見經父母兄弟因遣人召麻姑頃間麻姑來是好女子年可十八九坐定各進行厨皆金盤玉杯饌

膳多是諸花香氣達於內外擘脯行之云鱗脯也麻姑云接待已來已見東海三為素田向來蓬萊水又淺於往日豈將復為陵陸乎遠笑曰聖人皆言海中行復揚塵也時經弟婦新產數十日始見之曰勿前即以少許米擲之以祛其穢視其米皆成朱砂姑手爪似鳥經心中念曰背太癢時得此爪以爬背當佳也遠已知經心中所言但見鞭着經背不見有人持鞭者經比舍有姓陳者聞經家有神人詣門見願隨驅使遠曰君心不正未可教以仙道乃以一符與陳曰此止能存君本壽自出百歲可以禳災治病後陳

以符療病輒效壽一百十歲而死遠去經家所作飲食皆盡亦不見有人飲食也

劉根潁川人隱居嵩山中諸好事者自遠而至就根學道太守史祈以根為妖妄乃執收詣郡數之曰汝有何術而誣惑百姓若果其有神可顯一驗事不爾立死矣根曰頗能令人見鬼乃左顧而嘯祈之亡父祖近親數十人皆反縛在前向根叩頭曰小兒無狀分當萬坐顧而叱祈曰汝為子孫不能有益先人而反累辱亡靈可叩頭為吾陳謝祈請甘坐罪根默而不應忽然俱去後脩隱吳之洞庭山遍身生毛昇去

因號毛公壇

林屋山人王瑋玄授宛陵令李崇流珠升法謂崇曰  
子行此道雖出仕宦無妨仙舉復授以隱解法乃去  
入大霍山又授遁化泥丸紫府術以度世或云瑋玄  
楚莊王時人

蔣生郡人好神仙丹學弱歲棄家遊四方脩鍊未成  
後得一僕隸曰童全素者見生几上石硯忽曰子好  
烹鍊之法夫仙丹食之則骨化為金安有不長生耶  
今子之丹能化石硯為金乎生叱之曰汝傭者豈知  
仙事乎無妄言全素笑而已後月餘衣中出小瓢云

是中有丹能化土為金顧此硯以刀圭傳之生以為誕妄益盟之全素尋卒以簣盛尸將瘞忽亡其尸徒有巾帶木履存焉藥鼎有光粲然探之得石硯已化為紫金矣

許懋吳人素好黃白術嘗遇一道人將畫扇掛於壁有藥爐童子在上道人呼童子跪於爐前畫扇頻動爐火光炎少頃藥成道人曰黃白之術非積功累行不可為也遂告懋曰五十年後當於茅山相尋遂不知所在

三國



葛玄字孝先吳人初從左慈受九丹液仙經遍歷名山脩煉大丹丹成得仙號葛仙翁見抱朴子云仙翁每飲酒常入人家門前陂水中卧竟日乃出曾從吳王船行至三江口阻風船多漂沒仙翁船亦沉不知所在吳王歎曰仙翁有道何不能濟乃遣使求之久之忽見仙翁從水上行來衣履不濕而有酒容既見而言曰臣從伍子胥邀飲淹屈陛下于此又嘗舟行弟子見篋笥中有十許符因問曰此符之驗盡何事可得見乎仙翁曰神符亦無所不為弟子願見之乃取一符投之水中水迅急符遂流而下復投一符迎

水逆上再取一符投之亭亭不上不下湏臾上符下  
下符上會中央三符同聚而不流

干吉吳孫策時道士制作符水以療疾病吳會人多  
事之策嘗會客郡樓吉趨度門下諸將賓客下樓拜  
之止之不能策即命收之策毋曰干先生亦助軍作  
福醫護將士不可殺之不從竟殺之葬之失尸所在  
卽宗字仲綏少仕為吳縣令學精道術占候風氣後  
一旦有暴風經窓間占知京師大火燒大夏門遣人  
往叅果爾諸公聞之以博士召宗宗恥占卜進夜解  
印綬負笈趣去居華山下服胡麻丸得道今在鹿跡

山洞

晉

陸脩靜字元德郡人早通墳籍長慕神仙栖廬山白雲寺持律精勤送客未嘗過虎溪時與陶潛惠遠握手同行過百步大笑而別宋文帝素尚其風作停霞寶輦使徐湛宣旨留之不可太始三年作崇虛館通仙堂強招之使講道焉元徽五年三月二日偃月而化年七十二後三日廬山諸徒見霓旌紛然還山須臾而失初脩靜赴召常衣一布囊及逝遺命囊骸投所在巖壑門人不忍奉之山中未至忽布囊掛巖樹

謚簡寂先生詔以所居為簡寂觀

楊義吳人與許先生遁許長史謚結為神明之交嘗  
為公府舍人興寧三年義年三十六衆真降焉自東  
嶽上真司命君等二十三人又自太和靈嬪上真左  
夫人等十五人每旬輒數人同降高談道微幽指藥  
妙衆真每降所授詩章道要甚多華陽陶弘景論次  
為書號曰真誥

隋

周隱遙字息元洞庭山道士自云甬里先生之孫隱  
遙學太陰煉形死於崖窟中囑弟子曰檢視我尸勿

令他物相干六年後更生當以衣裳迎我弟子守視  
初甚臭穢虫壞惟五臟不變如言閑護之至期徃視  
身已起坐弟子以湯沐備新衣迎婦髮鬢而黑髭齋  
而直如獸鬣焉十六年又死如前更七年復生如是  
三度凡四十餘年且八十歲貌似三十許人煬帝召  
至東都尋還郡唐正觀中召至長安問脩習之道對  
曰臣所習者匹夫之事功不及物帝王一言之利萬  
國蒙福得道之效速於臣人區區所學非萬乘所宜  
問也復求婦山令狐楚作周先生住山記

負局先生負磨鏡局行吳市中得一錢輒問主人得

無有疾苦否有疾輒出紫丸藥與之服者皆愈

松江漁翁者不知何許人恒擢舟遊長橋徃來波上  
意氣自得醉則扣舷而歌紹聖中閩人潘裕自京師  
調官回道吳江遇而異焉起揖之曰余視先生氣貌  
固非漁釣之流願勾緒言以發蒙陋翁曰吾厭喧囂  
處閒曠遂迹於此三十年矣幼喜誦經史百家之言  
後觀釋氏書今皆棄去唯飽食以嬉尚何所事裕曰  
先生澡身浴德如此今聖明在上盍出而仕乎翁笑  
曰君子之道或出或處吾雖不能棲隱巖穴追園綺  
之蹤竊慕老氏曲全之義且養志者忘形養形者忘

道致道者忘心心形俱忘其視軒冕如糞土耳與子  
出處異趣子勉之裕曰幸聞先生之高義敢問舍所  
翁曰吾姓名且不欲人知况居室邪飲畢鼓枻而去  
宋

徐靈期吳人隱衡岳上清宮遇神人授玄丹之要含  
日暉之法守泥丸之道故得周遊海岳採訪山洞岩  
壑作衡岳記叙其靈異言紫蓋雲密二峯皆五千餘  
丈雲密有禹治水碑皆科斗字碑下有石壇流水縈  
之最為勝地而紫蓋常有鶴集其頂神芝靈草生焉  
有石室室有香爐杵臼丹竈祝融峯上有碧玉壇方

五尺東有紫梨高三百尺乃夏禹所植實大如斗赤如日食之長生蒼梧王元徽元年九月九日冲真至宋徽宗朝賜號明真洞微真人

齊

張道裕字弘真漢天師十二代孫梁天監二年來居虞山感異夢即於山下建治號招真初寥陽殿虛皇壇手植七檜又嘗鍊丹鑿井藏之

梁

陳景尚吳人善講誦道釋製靈書經大行于世梁邵陵王甚重之



張繹字士和郡人專心學道居貧守約講經理致深  
密詞端華辯當時所宗梁武帝雅相欽賞時陶隱居  
著法檢論明釋老二教繹討論有條緒隱居嘉之尤  
善八體書別製雲篆作茅山南洞記甚工

唐

單以清常熟縣元陽觀道士大曆中嘗往嘉興同載  
中聞異香見船頭坐一人儀表頗殊單君與之並席  
香氣彌甚因詢問之曰吾本地人少病入山遇一老  
人令從行有草堂數間居一月以藥一裹令餌之老  
人遂行既餌藥不飢渴身日以輕疾已差矣且曰服

吾藥可長生再拜問其姓名曰我是國初衛公李靖也單君曰記其事為人道之

周生大和中廬于洞庭山以道術濟人吳楚歌之後出遊廣陵佛寺有三四客偕來時八月望霽月澄瑩生自言曰某學於師能挈月致之懷袂或疑其誕或喜其竒生命虛一室翳四垣使無纖隙取筭數百呼僮以繩懸續架之曰我將此梯取月去乃閉戶久之數客步庭中伺焉忽覺天地曠晦聞生呼曰某至開室視之生曰月在某衣中諸君試觀舉其袖出月寸許一室通明寒入肌骨客再拜謝之却閉戶其外尚

晦食頃如初

柳條青唐大中末乞食於蘇州市中擊筑踏歌得錢  
惟市酒飲耳其歌詞中徃徃述方外長生事一日大  
雪凍死市人為瘞於齊門之左每遇日出時冢上有  
紫氣高五六尺近視則無後一年有皇甫頽來吳訪  
其人有示以墓所皇甫持酒脯祭之大哭設棺得青  
竹杖表之曰谷隱柳處士墓

清遠道士不知何許人嘗同沈恭子遊虎丘有作其  
詩云我本長殷周遭羅歷秦漢以歲計之蓋二千餘  
年其仙之流也顏魯公和其詩刻石巖上

申屠有涯方外士也嘗携一白甌瓶自陽羨遊吳大風雪中脫衣賃舟沽酒斗餘飲畢大吐同載者逐之有涯挈瓶登岸倚樹高吟曰仲尼非不賢為世所不容蚩蚩同舟子不識人中龍溪雪載落梅寒聲激長松狂來但清嘯一壺隱塵踪吟訖跳身入瓶悄然無跡舟人舉瓶碎之無所見他日同濟者有見於虎丘劍池側箕踞而坐知其為異人也

張志和字子同浮家泛宅在五湖震澤間號玄真子擢進士第守真養氣卧雪不冷入水不濡名山勝水多所遊覽顏魯公刺湖州與同遊平望志和酒酣為

水戲施席於水上獨坐飲酒嘯歌去來如棹舟聲復有雲鶴隨其上下觀者驚異志和遂於席上揮手謝別上昇而去

宋

陳希微字彥真吳人先名伯雄元祐中得疾因往茅山劉靜一求符水下山覺眩冒不能前據石大嘔疾遂愈棄家為道士築室柳沂泉上徽宗聞其名屢詔不起乃以所居為抱元觀而錫以洞微法師之號申元道泰陵人師事徐神翁得脩鍊術將出遊請于師師示曰逢虞則止無雪則開乃渡江至琴川見虞

山問於人曰此何山人曰虞山也即築菴居之挿竹成林因名竹林菴山中每患無汲一日大雪獨於菴前覆簣不積遂浚而得泉因名雪井紹興間喻抱元改名招真菴又嘗於福山建潛真館梅里建願真館為鍊丹之地

戴省甄長洲人初唐畢誠捨別業為太和宮省甄少孤隨母歸于畢氏以嗣焉與兄子玄棄俗入道

項舉之東京九成宮住持道士妙通法師宋政和八年来吳中為崇真宮開山有宸翰碑賜舉之者刻宮中

歐法師嘉定人紹興中有雲游士憇黃渡崇真道院  
數日別去且期三日後當再來為我具酒肴及期果  
至共為歡飲就法師掌中教書符訣令醮祀伏壇用  
之自爾法師主醮事人輒見其彷彿升空法師臨終  
挺然而化

易如剛字仁甫饒州安仁人初入龍虎山為道士慶  
元初召住三茅授太一宮高士後為崑山普照觀開  
山住持寧宗御書觀額及書正堂扁以賜嘉定六年  
又賜號通妙先生十四年加葆真元延祐三年加封  
通妙葆真文教真人

王惟一號景陽子括蒼人從父官華亭因家焉以儒  
飾吏事已而棄去從方外游遇至人授以還丹九轉  
心領其要乃著景陽明道篇金丹樞先天易贊祈禱  
問答行雷心傳道法精微凡六書晚居樊涇岳祠  
葉子琬字懷瑛括蒼人宋嘉定間開山于邑之集仙  
宮賜號冲妙大師脩煉之餘游戲翰墨嘗自寫像并  
贊云

應錫智字子信仙居人宋咸淳間來吳愛虞山之勝  
建志和道院精于道法弟子王大成平江路道錄  
蓑衣先生者淮陽書生也姓何氏從其祖朝議大夫



執禮避亂來吳中嘗舉進士不中一日游妙嚴寺臨  
池照影豁然悟道遂掛一蓑被髮徒跣往來市中團  
泥擲磚有類佯狂者言人禍福休咎多奇驗初無定  
止笑傲謳吟自適其適怒罵發嗔人莫敢近後結廬  
天慶觀前一土室常時叉手跪膝晝夜不寐晨必一  
至吳江洩焉或人有叩之者但云無人在這裏此是  
空屋微幾隱語驗而知神或經日月不食不告飢遇  
嚴冬敲冰洗簑氣騰如蒸所坐處雪亦不積嘗有語  
云自家屋子不脩整只理會自家屋子好看會有病  
者乞醫命持一草去病即愈衆翕然求治以蓑衣先

生稱之孝宗夜夢有蓑衣人跣哭來弔者訊之曰臣  
蘇人也詰其故不肯言居月餘成恭后上仙莊文繼  
即世上矍然驗昨夢有諭遣不至上念恢復大計累  
歲未有所屬且坤儀虛位乃焚香默禱自誠能仙顧  
必知朕意遂授璫以香茗曰汝見何則致贄而已問  
所以來則曰上自禱我不及知視其何以復命先生  
掉首作吳音曰有中國即有外夷有日即有月不須  
問趣之去既復呼還曰所問者姓我猶忘之但言朱  
家例子不可用也上曰是誠能知我心遂賜號通神  
先生築通神菴于觀之內親為宸翰書扁以寵之一

時強邀入菴大笑而出復栖故址已而成肅正中宮  
婦謝氏蓋本朝故事惟欽成本姓崔後育任氏朱氏  
既而惟從朱姓不復婦上意常欲以為比而未決也  
北伐之議亦少息焉上歲設齋合雲水士施予優普  
一歲偶踰期衆訝之忽於卧搖手瞬目曰亟來亟來  
舟至平望矣人有見於岸傍者蓋是日固未嘗出衆  
益服其神光宗即位召之不至慶元三年端坐而逝  
葬長洲縣二十都金鵝鄉燕塘之原

猷道僧兵家子少有所遇不言姓氏何蓑衣舊與之  
友狎不知幾何時髡而髻曰似道似僧故名狀不慧

言發竒中好蕩游市井間見人必求錢得則隨與貧者他日或薦道僧上欲見之何挽呼不使去且曰是將捉汝縛汝監汝不容汝來矣道僧竟去見于內殿不拜所言不倫上容之使出入勿禁踰年婦見何何以杖詬逐至死訖不與接一談紹興甲寅道僧入北內坐榻前曰今日六月也好大雪侍璫咸笑顧曰爾滿身皆雪相與罔測亦莫以為意至八日上厭代矣縞素如言焉

孫錯祥符末採藥入山遇道士授以符且與丹砂一粒曰此可召役鬼神當鬻此符可百錢足充汝衣食

既下山戴鐵冠被絳服騎牛至大名時太尉王嗣宗  
守魏表送闕下補司天監保章正專主符禁後不知  
所終

梁亮崑山人家駟馬橋下捕魚為業於鼠穴中嘗得  
書一卷讀之提刑吳潛舟次江上方小飲亮携籃步  
水上入潛舟潛怪問之曰欲假公金銀酒器潛與之  
投入籃而去明日見於橋上碎而分諸貧者潛以為  
妖追逮至官亮剪紙為魚游躍水盆中復剪一鷺飛  
繞庭下攫其魚而上衆仰觀遂失亮所在

程若筠吳中道士善畫嘗召至京師

李懷仁善畫龍嘗於毘陵天慶觀畫壁自題姑蘇羽士醉筆

鄧道樞字應叔綿州人以齋科精嚴際遇理度兩朝端平甲午隨魏了翁出蜀居吳郡守趙與憲俾住持文昌宮宋亡得上官氏廢園於城東為栖息所名會道觀時浙西按察使閻公子靜徐公子方輩皆與道樞游道樞工詩有東遊集尤善鼓琴

元

周文英字紫華至元戊子幸先生過吳城至紫華家見紫華讀參同契曰少年讀此何為其有所悟耶抑

有所慕耶紫華曰心有所慕耳未知所悟先生曰子  
有夙契可與語至暮留宿夜甚寒將熾炭先生亟止  
之視其所衣僅一木綿裘內襲褚衣曾不掩胫時方  
雪積已半尺所居有光赫然出屋上雪獨不積鄰人  
以為火操水具至救紫華異之達旦留詩別去叩其  
姓名乃指書中幸字故稱之為幸先生云問所止則  
曰舟泊楓橋明將過洞庭七十二峯西遊矣次日紫  
華冒雪至楓橋果見大船泊橋下先生倚蓬而笑曰  
吾知子必來因留欸以盡所言入舟治具出一小鼎  
僅容三合許匪陶甒石色紫而瑩貯水銀燵之頃微

有聲濺濺瀉水中搏之加以椎鍊則鏗然命舟子入市即能易物再貯水銀一器如前加以黑末半匕置鼎及成則黃金也盤旋終日執手而別曰吾即從此逝矣後會戊亥間當成子志紫華自此若有所得越歲甲戌一日以幸先生所書展玩曰茲維時矣遂歛衽端坐而逝若委蛻焉

古無極不知何許人居對門道堂築一室以白堊塗四壁中設榻常出所携瓢苗漁鼓等數懸壁上以書一束為枕自釀酒一甕於牀頭人有求飲握手弗許飲盡復釀日以為常扁其室曰小小蓬居室中皎然



如雪蚊蠅不敢入暑中開戶而眠不用帷帳猶犬至  
即俛首疾回無敢窺其內經年不見揮拂一塵不生  
未嘗出募於外而牀頭青蚨不乏人疑其術逼問之  
但笑而不言一夕撤去所用之物竟不知何往明日  
物色之追及對婁盤閭四門皆云是夕見其負籠荷  
杖出門去

莫月鼎諱起炎吳興人生宋寶慶丙戌少慕玄學至  
青城山見無極徐真卿授以雷術又聞達昌鄒鐵壁  
得王侍宸新勘法委身童隸事之鄒疾危遣去曰吾  
將逝矣雷書之全不能畀汝已而書張使者一符授

之再見潯陽楊真卿精於持練動與神合時憤世嫉  
邪托狂直于酒信筆塗墨符出詭祕語人莫能曉寶  
祐秋越守馬裕齋致之禱雨雨大澍理皇賜宸書詩  
贊至元戊子中丞崔或奉詔江南起覲京師祈禱有  
異驗賜宴光祿暨命典道教事力辭南歸抵吳城光  
盪巷學者填門嘗書鐵壁言于門曰百事動雷霆龍  
神拱手聽不洩亦不祕淵默有天聲癸巳冬謂其徒  
曰明年正月某日吾逝矣至期書一偈曰六十九年  
明月幾番陰晴圓缺今朝無缺無圓三界光明透徹  
書畢問歛具衆謂具矣復搖首曰待吾五事備須臾

天忽曖昧風雲雷雨電交作俟霽歛焉葬長洲縣陳公鄉實至元三十一年弟子得其道者吳下張雷所王繼華金靜隱馬心吾江東許無心陳靜佳今傳法曰周玄真玄真得之步雲岡雲岡實得之雷所會稽楊維禎作傳金華宋濂又為之碑

周詳吳人嘗泛東海誤到一山名曰絳嶼其地方千里上有千餘家莫知年歲亦有五穀風俗畧與吳同山上有陳長者已六百餘歲不飲食顏色如六十歲人山中人奉事累世每有疾病即以器詣長者乞祭水飲之輒愈詳畧三年還語如此

邊公式居郡城金獅巷母汪久病一日有客叩門青  
巾烏袍白皙而髯自言潤州范公橋張八叔也前巷  
袁二十五秀才令來切脉公式出見之客曰不必診  
吾已得尊夫人病狀留一方曰烏金散飲之母遂瘥  
公式詣謝袁秀才因以驚異坐側有洞賓像即前所  
見者究其畫本得於張八叔家公式由是求之以歸  
後仕赴調京師過天津橋見丐者為人毆辱公式問  
其故毆者曰負我錢五百文不償公式探囊中錢代  
償而去他日經其處丐者探懷中一瓶以餽見其垢  
穢辭不受他日又見拉至其家委巷窮櫺敗席障門

土榻上瓦盆貯酒果蔬為餞公式復不領畧他日得  
官南歸至汴堤風雪交作步不可前因憇道左旗亭  
中少頃主人出迎則向橋邊丐者相見良悅酌酒以  
進公式雖嘉其意終以往日垢穢不肯飲其人曰天  
氣苦寒非酒莫禦強為我釀此公式訖不濡吻其人  
怏怏乃包侑酒果為贈公式不忍重違勉受之上馬  
數步竟授其僕覺重啓視之桃李梨榴皆黃金也公  
式方悟其異人痛恨久之丐者復至曰官人自無仙  
骨爾指顧間酒家與主人皆不見

王可交吳淞南趙屯人以耕釣為業嘗棹舟出江口

歛見彩舫盪漾中流而來有道士七人皆少年王冠霞帔服飾各異侍者十餘人總角雲鬟又四人黃衣擢船一人呼王可交一道士令總角引可交上船見七人前各有青玉盤酒菓瑩徹有光不可識又有女伎十餘人悉持樂器可交立筵末遍拜七人共視可交一人曰好骨相合仙烘炙破矣一人曰與之酒侍者瀉酒再三瀉之不一人曰與之栗取二栗付侍者與之其栗色青如棗長二寸許肉脆而甘如飴食久方盡一人曰王可交已見之矣可令去勅黃衣送上岸向所乘魚舟不復見黃衣曰不必丹但瞑目自

到須臾回望峯嶺重複松柏參天乃天台山瀑布寺  
前也見一樵者并僧數輩皆來問可交所從來可交  
以實告問何時離家曰自三月三衆大驚曰今九月  
九日矣且去君鄉水陸千里僧邀可交具食可交自  
食粟即絕粒飲水耳僧以狀白唐興縣縣達台州州  
以聞越州廉使王渢召見可交身長七尺餘儀貌殊  
異言語精爽渢歎曰此誠真人也又以同姓益敬重  
之飾以道服遣人至蘇詰其家果言三月三乘舟入  
江不歸謂已溺死招魂葬之渢具以表聞可交後歸  
鄉與鄉人到白鶴江口指以為遇仙處後挈妻子入

四明山二十餘年復出明州賣藥酌酒得錢即施與人且言藥則壺公所授酒則餘杭阿母所傳藥以治病有驗稱以王仙人藥酒一時多圖其像人尚有見之者

張善淵字深父號癸復道人吳之華山人其伯父崇一始為道士得易如剛靈飛步法稱之為張雷師宋尚書包公恢薦于上命主郡之天慶觀故善淵從其學輒能捕逐鬼物呼致雷雨郡守潛說友舉住建德永隆宮再住平江光孝觀世所謂道法藥術凡四方有一術一法之異必究極其妙莫月鼎侯清谷時為



道門所宗咸異重之而樂授所祕元世祖詔舉山林  
有道之士嗣天師以善淵薦乃與其弟子步進德入  
朝奉旨召鶴且有禱亦輒應遂命為平江道錄住持  
天慶觀又改紹興昭瑞宮鎮江道錄壽九十二

步宗浩字進德早習儒中歲始慕道從張雷所于玄  
妙觀授回風混合大洞真詮上清靈寶三五飛步之  
祕碧潭斬勘之書如有祈禱雨暘呼召鸞鶴在乎掌  
握驅邪救患甚多靈迹延祐間制授貞元微妙弘教  
法師其弟子周玄真楊中立

黃孤山錢唐人諱道淵嘗遇郢人衛淡丘授以脩真

要法及醫藥方伎南遊武夷師事金華潘雷鑑挾其  
所北上後歸憇吳中吳人嚴其抱疾買地建壇以祀  
玄帝朝夕懇禱願愈斯疾而孤山適至授之以藥餌  
不數服遂愈於是壇宇悉歸孤山復為傾貲大構皇  
慶初延雷鑑為開山廣微天師聞于朝賜清真觀額  
倪玄素杭人從全真家風明心見性坐圓煉丹出金  
蓬頭一派至元間避寇至吳下于白蓮涇畔立栖止  
之地建佑聖道院

金善信字實之長洲儒家子生而雅好老氏之學父  
母嘗為納婦有子矣時張雷師能以符篆捕逐鬼物

因事之乃冠其冠執弟子禮及聞莫先生洞一者嗜  
酒醉輒詬罵人呼雷役雲狎藝如兒戲善信尤尊事  
之盡得其不傳之祕遂構仁壽觀於城東北隅日與  
其徒研覈妙旨其言以為心神至虛無所汨沒諸陰  
銷盡諸陽自集蓋有形者陰無形者陽陽益勝陰氣  
益調精我得清淨去道無難矣善信受知于嗣天師  
留國公起為廣德路道錄住仁壽觀聞之于朝璽書  
為之加護畀以體仁守正弘道法師之號其詳見金  
華黃文獻公所為碑

周靜清常熟雙鳳里普福宮道士至元間詔授清寧

抱一凝妙真人嘗提點平江路道錄宮中有芝生四十二莖長二尺許敷舒間金緣而生天師張與材為作玉芝祠記

侯頤軒其先蜀人宋季隨父來吳宋亡弗歸頤軒乃學道於洞庭之仙壇觀一時名士若中書劉公丞相吳公皆與之游寶祐間遊天台劉公詩送之其徒曰李碧山元虞奎章省墓于吳頤軒抱虞氏岳陽使君遺書與見白雲間因贈之詩曰洞庭高士成都客曾是相從大父時每抱遺書嗟往事復貽妙句樂新知鴛鴦影裏心元靜鷗鷺盟邊願不疑但得閑身各安

健白頭婦共橘中碁願軒善畫

步雲洲吳中道士事寡嫂女兄甚友愛

殷震亨字元震崇明西沙人出家為寶慶觀道士工詩所著有在山集元大德間人也

鄭守仁天台人著道士服長游京師寓蓬萊坊之崇真宮不事干謁齋居萬松間一夕大雪填門僵卧讀書自若號獨冷先生至正間來主白鶴觀

富恕字子徵宋丞相文忠公裔孫少為進士渡南而來居於吳值時兵亂遂為吳江昭靈觀道士善歌詩有名于播紳間嘗別築室雪灘之濱扁曰掛蓑亭又

繪仙山訪隱圖一卷寄興於雲海之上以研窮黃老之說遂昌鄭元祐為著記而亟稱其為人云同時有膺擇中瑛石室皆吳江詩僧恕與往還為方外交

國朝

席應珍字心齋號子陽子常熟沙頭人年未冠即辭家學老氏法兼讀儒書尤邃於易至於釋典方術之道悉能通焉孝於母膺髓溫清之奉勿少怠死葬如禮春秋祀享痛泣如初喪或謂親愛既割何得拘禮若是之過邪應珍曰吾法當割愛入道然世間豈有不孝之神仙也哉應珍始提點致道觀後遷郡之白

鶴及居相城靈應宮一坐二十餘年兵後能中興其  
業洪武十四年三月十日卒年八十一沙門道衍多  
得其傳嘗為葬銘

李德睿字士明嘉定人少出家郡之寧真觀旁通于  
醫過淮人李清隱授寶太師飛騰針法故以醫鳴洪  
武初召見至京力辭歸德睿兼通儒學孝友律身縉  
紳大夫多與之游嘗携一瓢賣藥吳市瓢小而類鶴  
因號鶴瓢道士潯陽張羽為傳王行高啓輩皆為賦  
詠

林剛伯常熟人博學能文詞寄迹老子法中永樂初

舉往龍虎山校勘道書嗣天師張宇初甚器重之嘗  
預脩永樂大典

周玄真字玄初嘉禾人其父月心仕陰陽教授生八  
歲而孤與母林氏居年十二辭家學老氏法于其邑  
紫虛觀從李太無為道士太無杜南谷弟子也至正  
戊子年二十始來蘇之城東葑門外黃泥坂丹霞里  
報恩道院玄真能以符篆召鶴因名所居曰來鶴軒  
仍自號鶴林先生玄真雖身寓方外事母林至孝其  
學受靈寶經法於谷神曹師又因玄妙高士顧養浩  
受五雷祕文於步雲岡步受於張雷所張親受於王



繼華其授之得其傳者莫月昺也洪武戊申京師李  
韓公迎玄真致雨有應明年庚戌上欲問鬼神情狀  
被召錫宴光祿又明年上召問雷霆所以神之故對  
曰天地之間陰陽運轉故有神神與人合者也雷非  
人無以知雷之天人非雷無以知人之天天人相孚  
同一理爾上悅壬子三月不雨右丞相汪公命玄真  
致禱其應如初乙卯又旱玄真禱亦應冬無雪復命  
玄真祈之己未授領神樂觀事玄真嘗脩達安里橋  
于通衢及主報恩道院嘗一新其祠宇繼主常熟致  
道觀復脩丹井其澤物之功類此卒葬月昺墓次

郭守源字本中幼從白羊山人張仲簡學詩時聞玄妙觀周玄初道行守源事之得其所祕洪武初應選居神樂觀後薦其名官于天壇奉祀凡朝廷祀事建太壇塲勅副四十三代天師無為真人故眷渥日隆賜與有加永樂元年擢道錄司左至靈佐領天下玄教住持朝天宮後終 皇儲製文諭祭

胡道安松陵人從玄妙觀計玄老為道士晚遇至人授青城太乙雷書及斬勘魃魔祕旨洪武末郡中秋旱太守率僚屬致禱道安登壇醉酒詬罵怒髮衝冠令下陰雲四合雷雨大作守為稱異性佯狂人呼為

胡風子

楊中立字玄微少入玄妙觀嗣步雲岡為太極五雷壇正宗志尚朴素甘分林泉取漆園吏之言扁所居曰一枝巢遂昌鄭元祐為之記洪武壬戌掌道紀司薛朝陽字廷鳳先居龍虎山上清宮號洞玄冲靖廣道大真人有齋糧田在崑山澱湖上因築觀堂游息于此洪武二年寓居江灣報恩宮時年九十三陳昉吳江縣吏也平生崇奉三教廣行陰騭惟未能斷食魚之好嘗於池中養魚以待烹啜方欲作膾待賓忽池中偶侶人言悲哀乞命於是省悟盡放其魚

於江是夜夢群魚謝曰玉帝知君放我等萬千性命  
已令天曹掛名仙籍三年后果於長橋踏白石上昇  
論曰世有神仙引導之術經簡而幽幽則妙門難見  
言實而抑抑則明者獨進大都蠲去邪累澡雪心神  
乃有虛駕昇天長生世上者焉却粒之士餐霞之人  
非滅景雲棲抗高木食無以成其羽化遂其獨往故  
隱迹卽官潛名柱史則東明九芝之蓋北燭五雲之  
車樵客看棋羽人採藥則爛柯斧于空山閱仙書于  
南洞策非世教人豈常流看桃核而問棗花庭舞經  
乘之鶴坐絳雲而臨玄水池游被控之魚何必蓬萊

方丈瀛州三神山乃有諸仙及不死之藥哉文中子曰玄虛長而晉室亂非老莊之罪也養性得仙各自有法凡三十六吳中若赤鬚子之好食石脂以服食度骨筋者也魏伯陽之神丹仙去以藥石上騰雲者也葛孝先之行水不濕以清靜飛凌雲者也劉根之下神鬼以祭祀致鬼神者也陸脩靜棲雲寺以去欲但存神者也楊羲高談道要以把握知塞門者也周隱遙生死無恒以太一柱靈氛者也張志和守真養氣以恬澹存五官者也張繹居貧守約以寂寞在人間者也倬矣仙才飄然勝氣其間階次心行等級非一

覽之起人外之想如朋松石介於孤峯絕嶺窺烟液  
臨滄洲矣區區市朝井邑踰居幸生如蛙在井中駒  
處轅下者胡足與語懷玄抱真之事哉

贊曰紫館丹室素券赤明指樹為姓合氣為名寢宴  
綠房飛步玉京升玄內教靈寶上清從師採藥病愈  
身輕去留青鳥昇沒虹旌

吳中人物志卷之十一

吳中人物志卷之十二

長洲張

曾

方外

西晉

竺道生鉅鹿人姓魏氏初入廬山幽栖七年後游長  
安從什公受業關中僧衆咸謂神悟獨文字之師以  
生為邪擯而遣之遂之虎丘山聚石為徒講涅槃經  
至闌提有佛性處曰如我所說契佛心否群石皆首  
肯之至今虎丘有點頭石

支遁字道林姓關氏家世奉法年二十五始釋形入  
道住剡東岬山性好鶴鍛其翮不復飛視有懊喪意  
後養令翮成致使飛去間與何驃騎期當為合八閔  
齋以十月二十二日集同意者在吳縣土山墓下三  
日清晨為齋始道士白衣凡二十四人清和肅穆莫  
不靜暢至四日朝會衆賢各去既樂野室之寂又有  
掘藥之懷遂便獨往諒天爵以不加為貴誠逸祿以  
靡須為足有道林集為釋門絕秀矣

智積菩薩當東晉末自西土來開山於靈巖寺剏立  
伽藍泗州僧伽持鉢江南至常之無錫聞智積在蘇



州即日回曰彼處已有人矣由此名遂顯有一貧婦慕其行嘗持角黍為供智積受之姬因得度至今上巳日號智積誕辰每聚數十百姬為角黍會

法惜西域人晉義熙中至中夏與慧遠法師結社廬山已而來蘇念佛三昧化導有情蘇人翕然歸之為建淨壽院居之

隋

智琰字明聚郡人姓朱氏梁散騎侍郎獻之孫幼事通玄璩法師授典過目輒成誦長遊都下與清安禪師齊名陳亡歸虎丘憑岩面壑者三十載澗飲藿食

世味泊如隋尚書令楊素左僕射蘇威皆嘗駐節山中接其緒論煬帝鎮維揚具幣招致琰恐重累使者為之一起及見辭以疾竟不為用卒窆武丘東寺梁

僧林吳人有道行大同中入蜀居潼州豆圖山禪默累日見巨蟒於前舉首如有叩者林為授三歸自爾蟒不為害涪水之陽素無猿林至有二猿度水來依林栖林去猿復涸還又嘗露坐赤水岩虎前伏聽林說法久乃去

惟靖吳人年三十許入國寧寺禮闍黎大德慧政受

天台教嘗侵星赴梓林寺晨粥而多虎豹隨到寺門  
虎跪地若伺候靖一復隨遲明巨跡極多靖恐人知  
以鋤滅虎跡俄疽發背困睡有鳩鳥糞瘡所未幾全  
愈又虞冰雪置杭地窖中日以銚合菜煮食過期米  
常滿不耗靖乃築之而云吾被此物知非理也卒時  
年七十餘

慧嚮吳興人姓懷氏梁天監中後居虎丘不得甘泉  
乃俯地側聽得泉曰虎跑泉是也駐錫馬鞍山謀建  
塔廟坐於山脇石室間有二虎為侍方運籌思俄有  
神人謂曰願施千工以成是夜風雷震吼林木號怒

但聞樸斲聲明日竒石矗然廣階駢城截如也延袤  
十七丈高十二丈蓋山王之後神工耳事聞武帝為  
造寺名慧聚今山中尚存石像於室中扣之鏗然有  
聲呼為嚮大師

醯醢尊者一作憨憨未詳何許人其在虎丘卓錫得  
泉名憨憨泉復在寶華寺亦以是名

店

義師不知何許人狀如風狂貞元中巡行吳苑乞食  
忽於民肆運斤壞屋簷十餘間其民禁之不得人知  
其神禮曰弟子活計賴此頤曰爾惜之邪擲斤於地

而去是夜市中火惟所經壞者獨存嘗止一廢寺殿  
中冬夏積火壞幡木像悉燔之好活燒鯉魚不待熟  
而食垢面不洗洗輒兩吳人以為兩侯將死飲灰汁  
數斛乃念佛而坐不復飲食人聚觀之七日方逝盛  
暑色不變支亦不摧

續空本齊君房也苦貧勤學為凍餒所驅元和初游  
錢唐至孤山寺西飢甚不能前俄有胡僧顧君房笑  
曰法師諳旅况否君房曰何哉僧曰子不憶法華經  
于洛中同德寺乎應為飢火所惱不暇憶前事探鉢  
囊出一棗大如拳曰此吾國所產食之知過去未來

事君房食訖甚渴掬泉水飲之急欠伸枕石而寢有頃乃寤思講經于同德寺如昨日焉遂落髮

鑒師元和初郡人馮生調選長安有老僧自稱鑒師詣生曰汝吾甥也相與往來歲餘馮得東越尉鑒師負笈告去曰我廬於靈岩寺之西廡久矣游長安忽十年幸與君相遇今將歸故來告別然君尉越道出靈岩寺當一訪我後馮生詣寺詢之曰鑒師安在寺僧曰吾寺中無名鑒者生始疑異謂彼信士豈欺我至西廡下乃有群僧畫像其一狀類焉視其題云馮氏子吳郡人年十歲學浮屠氏法以道行聞

印宗精涅槃經咸亨中詔至京師居大敬愛寺辭往  
蘄春謁忍師遂至廣州遇六祖能大師盡悟方外之  
旨著心要集行世

元遂南禪寺千佛堂轉輪藏成緇白徒聚謀曰功德  
如是誰其尸之宜請有福智僧越之妙喜寺長老元  
遂禪師為之主僉曰然遂既來教行如流僧過如歸  
供施連颺隨日而集師又日與苾芻衆升堂焚香合  
十指禮千佛然後啓藏發亟鳴犍椎唱伽陀授持讀  
誦十二部經經聲洋洋充滿上下遠近有情識者法  
音所及無不蒙福法力所攝鮮不歸心信有以表旌

覺路指轄法輪矣

齊翰開元中住武丘道性淵默心不閑事與皎然甚契

智聚住武丘東山胤法師弟子至德二年奏勅太極殿進講金光明經天子嘉禮歸卧舊山開皇間璽書勞問卒窆山南虞世南為文

法恭吳人為智聚弟子居武丘為道者貴其精力

瑗字辯空嘗披一衲不計寒飢勤行精進嘗撰武丘僧苑一卷注郁子二卷文集三卷

文暢師吳人韓文公有送北游詩



元達上人年踰八十好種藥有藥園在重玄寺其品多致自天台四明包山句曲叢萃紛糅各有指名皮日休嘗為賦詩

貫休婺人居萬壽寺禪月閣因稱禪月太師有詩名禪月集梓行于世又善畫古佛嘗自夢得十五羅漢梵相缺其一有告者曰師之相乃是遂為臨水圖以足之其畫本猶傳

畫字皎然工詩嘗謁韋蘇州乃苦思作古體十篇為贄韋殊不稱賞畫為之失望明日寫舊製復謁韋吟諷不釋手云師幾失聲名不以所工見投而猥希老

夫之意人各有所得非卒能致盡服其精鑒

五代

後唐廬山僧紹宗郡人性朴野不群流俗江南李國主造寺居之又躬入山請謁甚加禮重

漢清化師全付崑山人隨父賈販至豫章聞禪會之盛求出家學成自仰山還故國錢忠獻王賜以紫方袍不受改號純一法師開運中坐亡有大風震林木焉

紹明律師慧聚寺僧居半山彌勒閣一夕夢有神人曰簷前古桐下有石天王像與銅鍾詰旦掘其地果

獲之今尚龕置壁間形製甚古有詠之曰一旦石像  
欲散現先垂景夢鳴高岡常熟破山恩高僧學於紹  
明

宋

遇賢郡人林氏子出家東禪寺性嗜酒人稱為林酒  
仙其貌恠偉口可容兩拳手無過膝日行路中嘗持  
一錢槌見瓦甓輒碎之人問其故荅曰世路不平闔  
郡酒家得其飲酒獲利十倍有一酒肆奉之甚謹其  
將示寐至其家曰吾日飲汝酒未能酬直今以相報  
耳乃大吐石曰中囑以紙封關三日啓視之則已結

如鷄子未幾疫痢大行人服其一七則瘥酒家因以致富祥符五年年八十八而化其骨尚塑于像存寺中遇賢喜作詩時有警語張丞相即之手書刻于歷陽尤能前知人禍福言無不驗郡守梅詢贈之以詩曰出入常携一古藤三衣簾重貌稜稜紅塵酒滿何曾醉知是僧中第幾僧郡中嘗有虎為患遇賢騎虎出城去其患遂息又嘗渡江遇風舟將覆解袈裟為帆風濤即止其神異如此

道川本崑山縣弓手以勇力名方被差捕宿一廟中忽有所得竟投山西東齋出家遍游江湖道遇虎不

為動虎亦馴伏一日大書云我有一條鐵柳標縱橫  
妙用無人識臨行撥轉上頭關轟起一聲春霹靂危  
坐化去有注金剛經

蝦子和尚宋承平時好食活蝦丐于市得錢即買貯  
之袖中且行且食或有隨其所往視之即出哇于水  
羣蝦皆游而去

毛僧日遊聚落飲啖無所擇輕薄子多狎玩之貴勢  
要之不諧忽謂人曰吾死矣乃危坐誦偈曰毛僧毛  
僧事事不能死了燒却恰似不曾言畢而化

法全崑山陳氏子棄家從道川叅請勤至一日行靜

濟殿偶撞其首于柱間忽然大悟旁人見其光彩飛動自此遍走山林道價日增後住吳興道場山

譖三命承天寺僧好食活鷄精於陰陽之術吉凶多驗人欲其卜葬則以數十活鷄隨之聞其聲咿然食之愈喜後焚有五色舍利自舌本湧出

宗本承天福昌院飯頭飯熟必禮拜然後供僧一日忽悟恣談皆經中語見道甚明人有飯僧者必告曰汝先養父母次辦官租如欲供僧以有餘及之徒衆在此豈無望檀那之施須先為其大者率以是勸人仁宗嘗召見賜金欄衣加圓照禪師歸山其先至者

師時有貴戚試以娼女薦寢登榻鼻息如雷娼為般  
若光所憐一夕不寐明日焚香禮拜云得見古佛

希辨常熟寶嚴院僧吳越錢王之子太平興國中隨  
王入覲見于滋福殿賜紫方袍號慧明大師尋歸故  
刹賜金造七級浮屠淳化三年御書急就章逍遙詠  
秘藏銓聖惠太平方凡一百四十三卷以旌之

道元住永安禪院祥符中嘗進所纂佛祖近代禪  
語為禪錄三十卷詔翰林學士楊億等刊定刻板宣  
布

道欽崑山圓明村朱氏子授業景德寺游歷叢林遇

一道者語之曰汝乘流而行逢徑即止欽至臨安見東北一山秀出樵子曰此徑山也欽遂居之為開山第一代禪宗嘗召至內庭賜號國一禪師今薦嚴寺有羅漢橋蓋指國一云

淨梵嘉禾人十歲祝髮勝果寺元祐初住蘇之北禪寺講法華經懺感通普賢受羯摩法呼淨梵比丘長洲令王彥為記其事卒葬橫塘般若院

法遠鄭圃田人出于王氏年十九游并州從嵩禪師受具足戒再歷諸方遂來住天平山擬班固九流作九帶叙佛祖教義博采先德機語參同印正學清傳



之歐陽文忠公一日造其室因與客棊遠坐其傍文忠請棊說法有從前十九路迷悟幾多人之句文忠嘉之所著有偈語妙密號柴石野人少與達觀頴公輩游蜀屢更橫逆以智脫之衆謂其諳吏事又號遠錄公詳見惠洪所為傳

法雲字普潤長洲彩雲里人六歲從師授法華經輒能成誦後參南屏清辨得言下旨政和七年徵猷閣直學士應安道舉為松江大覺住持未幾以母老歸養日以內外典從事非閑會不出有注解金剛經心疏鈔息陰集行世

可觀字宜翁華亭戚氏子年十六具戒依南屏精微  
師聞車溪聲振江浙負笈從之忽有悟乾道七年丞  
相魏杞出鎮姑蘇請主北禪適當九日上座作偈云  
胷中一寸灰已冷頭上千壘雪未消老步只宜平地  
去不知何事又登高魏公歎賞及得所遺法語謝曰  
當用拳拳斯道不敢孤負吾師有圓覺手鑑竹菴錄  
行世

良玉字蘊之慧聚寺僧行甚高旁通文史琴奕因游  
京師梅聖俞見而喜之以姓名聞于朝賜以紫衣仍  
作詩送其東歸曰來衣茶褐袍歸變樸色服扁舟洞

庭去落日松江宿水烟晦琴徽山月上岩屋野童遙  
相迎風景明橡櫨後潛遁故山專以講經為務名所  
居曰雨花堂

宗秀吳僧也范文正公為其序曰師生不血食七歲  
持佛事隱于靈岩有年晚游名公之門未嘗及利天  
聖中大丞相東平清河二公奏賜紫方號定惠大師  
慈受禪師靖康中住靈岩學徒甚尊之所作偈頌有  
文法嘗自贊云醍醐與毒藥萬味同一口美惡盡消  
融是故名慈受時高峯和尚雖相去不遠絕不會面  
因中秋賞月書一絕云靈岫高峯只尺間青松長伴

白雲開今宵共賞中秋月莫道山家不往還

清順尊者郡守魏公迎住虎丘乃啓禪派

英覺印政和間住虎丘宣德卽何安中嘗為像贊

通法海覺印弟子子瞻與之游有書遺問

圓悟禪師說法虎丘張丞相浚嘗有祭禪師文稱其

發明正因起卓竒特真古佛語

彥偁虎中獵夫箭彥偁為拔之見破山寺記唐有懷

述常達宋有彥偁晤恩世稱四高僧

紹隆含山人師事圓悟得臨濟心妙大播東南住虎

丘居三年葬其山司農少卿徐林為塔銘

宗杲號妙喜思陵阜陵凡三賜號兩住徑山來上虎丘紹興中嘗抗論和議頡頏胡公高宗上封事雖在方外其亦不忘世云

淨雪庭嘗以詩僧自通於郡守守書其刺云詩僧馬敢謁王侯淨續云大海終須納細流昨夜虎丘山上望一輪明月照蘇州守為大喜

慧遠嗣法圓悟孝宗召見賜坐問如何是心遠正身义手立曰只這是

慈悅隆興間海隅山僧初患水腫病有客自云姓回以指爪劃其腹水漬腫消授以藥且云壽至八十五

後兩月又有客授呂真人像乃悟前所姓回者即真人也

惠詮東吳詩僧也佯狂垢汙而詩絕清婉嘗書湖上一山寺壁曰落日寒蟬鳴獨歸林下寺柴扉夜不掩片月隨行屨唯聞犬吠聲又入青蘿去蘇子瞻愛而和之曰唯聞烟外鍾不見烟中寺幽人夜又寢草露濕芒屨惟應山頭月夜夜照來去詮以此詩知名

道潜亦詩僧有標致嘗自姑蘇過西湖經臨平作詩云風蒲獵獵弄輕柔欲立蜻蜓不自由五月臨平山下路藕花無數滿汀洲子瞻赴官錢唐得詩大稱賞

蘇移守東徐潛往訪之館于逍遙堂士大夫爭欲  
面蘇饌客罷俱來紅粧擁隨之遣一妓前乞詩潛援  
筆而成曰寄語巫山窈窕娘好將魂夢惱襄王禪心  
已作沾泥絮不逐東風上下狂一坐大驚潛作詩法  
淵明有逼真處曰數聲樵笛蒼茫外何處江村人夜  
歸又曰隔村彷彿聞機杼知有人家住翠微時從蘇  
在黃州京師士大夫以書抵蘇曰聞公日與詩僧相  
從真東山勝游也蘇以書示潛誦前句曰此吾師十  
四字師號耳

仲殊字師利承天寺僧初為士人預鄉荐妻以藥毒

之遂削髮為僧時時食蜜以解毒藥子瞻與之往還  
甚善號之曰蜜殊工於詩詞有寶月集當時有詆其  
所作多艷體

有規為人坦率其徒謂之規方外能詩言論洒落時  
年七十矣臨終前有詩曰讀書已覺眉頭重就枕方  
欣骨節和睡起不知天早晚西窓殘日已無多葉左  
丞為稱之

冲邈居崑山翠微年八十八好為詩所著有翠微集  
有評其詩云聖宋吟哦有九僧詩成徃徃比陽春翠  
微閣上今朝見格老詞清又一人



則之彞老嘉定外岳楊氏子禪學有十玄談參同契  
詩有禪外集俱什世嘗作早梅詩云數萼初含雪孤  
清畫本難有香終是別雖瘦亦勝寒橫笛和愁聽斜  
枝倚病看朔風如解意容易莫吹殘又雪霽觀梅云  
荒園晚景歛寒烟數朶清新破雪邊幽艷有誰能盡  
得冷寒無主賴詩傳看來最畏前村笛折去難逢野  
渡船向晚十分終更好靜兼江月澹始娟

法貝蘊常法平俱吳人能詩具有絕句云鶴鳴九臯  
秋夜永紙帳芙蓉卧燈影九州之外更九州誰解摩  
心發深省常詠石菖蒲詩云細水圍碁石纖纖手自

移幾年離雁蕩萬里到天池平登北固樓詩云不負  
南徐眼來看北固雲金焦兩山小吳越一江分皆有  
唐風致蓋勝流也

定欽蘇州定惠院僧蘇公謫惠州嘗擬寒山十頌使  
其徒卓契順往惠州寄慰安否蘇得詩甚嘉之有曰  
語有璨忍之通而詞無島可之寒為和八首初契順  
涉江度嶺徒行露宿僮仆瘴霧薰面重足為其師持  
書至惠且曰惠州不在天上行即到耳投書徑還公  
問其所求答曰契順惟無所求故來惠州若有求者  
當走都下矣苦問不已乃曰昔蔡明遠鄱陽一校耳

顏魯公絕粒江淮間明遠載米周之魯公憐其意遺以尺書天下至今知有明遠今契順雖非明遠然區區萬里之勲儻可援魯公例得數字乎公遂為書淵明歸去來辭以遺之今定慧刻石存焉

贊寧吳僧博物稱于時柳如京徐騎省與之游或就質問難事楊文公歐陽公亦皆知名嘗采經傳物類相感者為書十卷又撰筭譜二卷時有安鴻漸好嘲謔遇贊寧與數僧偕行指而言曰鄭都官不愛之徒時時作隊贊寧即應聲曰秦始皇未坑之輩徃徃成群其敏捷如此

繼肇法能俱吳人肇工畫山水與巨然同時能工畫  
羅漢

普現字無隱西隱寺僧臨終有偈云五蘊色空皆是  
幻空華世界本非真西方淨土華池上別有無為清  
淨身

子芳字春谷法昌寺僧雲遊四十年不返叅學天目  
山又十年乃歸謂其徒衆曰吾化緣盡矣索筆書偈  
云負荷犁鉏歲無力強呻吟一聲掣動鼻頭索萬水  
萬山何處尋

清珙常熟人叅學及菴和尚得其指的居霞霧山三

十餘年樵蘇之後躬自為之有古德之風禪餘喜作詩有山居吟并有語錄

永珍字季潛臨川人十三祝髮為僧入徑山叅範無準禪師入太白叅痴絕冲城翁辭歸過雪川舟覆墮忽有悟見石溪石溪曰汝來矣使侍左右其宗出楊岐會禪師者也嘗來憩虎丘又住常熟能仁嚴勁卓立風采振厲聞于四方至元間有旨移住平江萬壽後築室葑門外以待叅學者署曰天隱菴大德庚子留偈化去火之得舍利并其骨塔于吳虞文靖公實為之銘

德正徐兢之兄登科為平江教官棄去為僧能畫山水人物種種清絕專師龍眠

文了善烹茶每盞旋謂之攪和事畢方始入湯花栗如沸嘗游荆南高保勉白于李興延置紫雲菴日試其藝保勉父子呼為湯神奏授宣華定水大師

元

餘澤字天泉郡人陸氏子學天台氏教辭鋒辨博音吐如鍾大德十一年出世吳之永定遷北禪尋奉召住杭之下竺會朝廷勘金書藏經居京師於翰林諸老往來倡和方萬里於吾衍座上見其詩豪放愛而

摘奇句為長春集序而歸之後門人編次平日所作為兩華別集虞伯生為序

圓至字天隱年十九出家依仰山慧即大師為浮屠有文名所著筠溪牧潛集方圓為序又注周伯弼三體唐詩晚齋磧砂寺

良琦字元璞出家天平寺號龍門老樵有詩名與楊廉夫鄭明德諸名勝倡和其詩多見顧王山草堂雅集中

衍道原石湖人工詩尤善書至正初主嘉禾德歲寺才辨聞望傾于一時有碧山集危太僕為其序

妙聲字九臯吳縣橫金人出家郡城景德寺授業于  
天泉學文于道原年十九以詩謁袁伯長學士答之  
詩有云天機不受梁燕語逸興直與江鷗親甚見引  
重有東臯錄刻于寺中洪武辛亥被召赴闕顧問稱  
旨賜金還山

椿大年吳中巨族沈大傳八葉孫早以詩名叢林中  
遊錢塘南北兩峯與南屏報上人賦詠爭奇勝見顧  
玉山草堂雅集

晉明嗣法徑山晦機熙公後住承天寺以畫蘭與柏  
子庭齊名



慶閒字無逸吳僧嘗箋注范成大田園雜興六十首  
方回鄭國為前後序仇遠顧逢又為賦詩益重其訓  
詁之學也刻梓行世

善住字無住精於詩有谷響集仇遠白珽為序仇稱  
其五言似隨州七言似丁卯絕句似樊川古詩出韋  
陶諸作

明無照虎丘詩僧有卧雲橋無住作序

南楚悅禪師虎嵒伏公法嗣至元初自廬山開先來  
主承天寺僅以衣鉢坐具一布囊自隨寺燬任起廢  
之責功成遷徑山未幾退處郡中

清欲臨海人幼入徑山師禮虎嵒間謁古林茂公茂  
云雖是後生却堪雕琢至正間主席靈岩入院上堂  
云石門巖險錢關牢舉目分明萬仞高四十年中重  
到此始終不隔一絲毫

自厚字子原吳縣人從學靈隱東嶼師歷住穹窿秀  
峰諸名山其弟子中行深於禪觀之學嘗居壽岩菴  
時苦旱山石不可穿并夜夢神人告分七寶泉一脉  
來覺視其處泉果涌出因號夢泉禪師

維則字天如俗姓譚氏吉之永新人得法於普應國  
師中峰本公時倡道天目山之師子巖惟則退處松

江九峯者十二年道價日振至正二年門人相率買地築室以居名曰師子林蓋以識其授受之原也帝師法旨以菩提正宗寺額兼以佛心普濟文慧大辯禪師之號金闡僧伽梨衣自中峯以來臨濟一宗化機局段為之一變故多論建有楞嚴會解若干卷語錄別錄剩語又若干卷皆刻林中

悅可字中庭嘉定人受具於了堂禪師後即西隱寺築十六觀堂以脩淨業元統間錫號慈光齊照佛日廣惠大師至正甲午坐化

了通智林寺僧也嘗晝寢寺僧呼之覺曰通州火吾

適採之明日人渡江云狼山寺火有僧於烈焰喫酒  
滅之火有酒氣狼山人來謝了通衣尤焦灼

衣和菴主崑山人隱居雪竇畜二虎恒跨之以遊後  
徙二靈終焉初雪竇妙高峯在千丈巖顛有藤一枝  
蜿蜒其上下臨不測乃蟠結成龕因名栖雲大德丁  
未燬于盜更二十年不克復虎乳其壻而為害咸謂  
菴復而和祠則虎禍返息至元丙子復其菴肖其像  
於是二虎前伏餐慈飲和屈猛從仁不為害和師在  
日有四偈詠藤龕

國朝

隆菩薩姓施氏尹山寺僧也洪武壬申四方沙彌給牒京師老三千人悉籍為軍時旱方禱雨隆因乞焚身以代之至雨華臺望闕再拜取瓣香取風調雨順四字語中使曰為我奏之既焚雨即大澍上喜曰此真永隆雨也製落魄僧詩以彰之

蔚萬峯温州樂清縣金氏子十九參中峯法嗣長干巖于義烏山中千岩奇之乃盡得其傳而歸久之行錫至吳登玄墓山掘地得石上有鄧尉峯字蓋玄墓山一名鄧尉與其名適同蔚亦知緣在浙西乃即山達大伽藍三十餘年道風遍布如谷應聲叅學之士

駢集座下洪武辛酉有召起之蔚預知即以衣法付諸弟子結跏趺坐而說偈曰七十九年一味扯田縣崖撒手果日當天語畢而逝使至則蔚示窆已七日矣停龕十三日肢體猶溫門人奉其身塔于院之西岡

覺曇嘉定人祝髮于崇明慈濟寺平生茹素未嘗妄語言未來事歷歷有驗或卧于榻或有見其行于市者以此皆稱覺菩薩成化十七年五月五日趺足坐于龕頃之化去月餘面如生肢體溫軟其身至今不朽舉之若空衣焉

智及字以中吳縣人海雲院為行童王都中見而異之俾祝髮受具遂走違業從廣智訢公學文同袍者呵曰子才俊爽若此不思負荷大法甘作詩騷奴僕乎無盡燈偈所謂黃葉飄飄者不知作何見解噤不能答即歸海雲目不交睫者逾月忽見秋葉墜庭豁然有省入徑山謁寂照端公勘辨之頃隨機而答端以法器期之悉取三乘十二分教溫澤之宗通說貫漑漑如懸河諸老無出其右洪武初應詔居天界以病還海雲卒宋景瀛為著塔銘所著有四會語錄若干卷

明空山福興寺僧始居功德寺有禪行被 太宗文  
皇帝眷賚欲官之一日逃歸山中晦跡不出寺廢壞  
明以其力新之

常在初住崑山永懷寺繼主薦嚴承天洪武間住持  
京師鷄鳴寺召對稱旨改住育王卒葬薦嚴

寶曇和尚先世自汴入吳母生之夕夢有僧踵門適  
天目斷崖禪師示寂謂斷崖再世也襁衽中見僧輒  
喜笑見佛即禮拜常時疊足方起一時景從皆以和  
尚稱之隨方建立伽藍 洪武六年應召至京師賜  
膳慰勞令就居天界寺又久居蜀之峨眉因奏先居



吳門集雲妙隱大雲三阿練若乞今為一因勅號南  
禪集雲之額二十五年示寂于天禧寺上傷悼遣官  
諭祭飯僧三千茶毘會者萬人命其徒分遺骨歸葬  
于吳乃峨眉建塔焉

大祐字啓宗俗姓吳氏幼開悟聞誦楞嚴咒隨口成  
誦年十二出家寄心菴內外典一覽能通大義既壯  
為澤天泉司懺又之武林從及公叅禪洪武間召  
與蔣山廣薦會遷郡之北禪歷僧錄司左右善世會  
內難棄歸穹窿永樂初起脩佛書凡括大般若義六  
作卷及平生所著淨土指歸淨土真如禮文彌陀金

劉二經真解天台授受圖法華撮要圖淨土解行二門圖

一清出家郡之能仁菴授業得岩行法師得賢首宗旨著華嚴圓覺楞嚴楞伽諸經論

文琇字南石崑山李氏子出家紹隆院得法虎丘行中禪師洪武初住郡之普門遷靈石萬壽永樂間住徑山歸老松院有續傳燈錄四會錄

大彰字彥珪通內外學永樂初預纂心經金剛楞伽等註後終于南翔寺

道存字性中永樂初出世南翔起脩大明三歲法

書書成住昆福寺卒與大彰同為嘉定人

道澄字心印長洲任氏子出家治平寺宣德中詔

授右覺義住持大功德奉勅校歲典于中禁年七

十三示寐賜祭葬治平方丈後

懷瑾字如珪嘉定人出家保寧寺嘗預脩永樂大典  
瑛大章住南禪寺鄉人褚守行以金銀若干寓託而  
守行坐事家破身死子德囷戍永平墳不遠三千里  
負其物抵戍所還之又有萬壽寺僧琇伯瑩者有杜  
經歷以銀密寄其處杜既死訪其子還之

琳西玉江陰人至正乙未出游名山川會亂亟歸覲

寇數欲兵之告以故得免既聞父兄皆沒亂中餘母  
在嫂以不辱溺井死琳乞食養母逾年而卒為焚香  
地遂奔隱吳門血書華嚴經席帽山人王逢稱曰孝  
僧贈之詩曰華嚴內典釋中尊書向吳臺獨樹村十  
指滴枯遺體血一心追報二親恩

道衍字斯道長洲相城姚氏子出家妙智菴少從高  
啓輩為詩聰敏過人啓極稱之所著有逃虛子集洪  
武間以高僧召太宗舉義衍以輔翼功進秩太子  
少師卒謚恭靖

溥洽字南洲陸姓山陰人洪武間住北禪後應召起

為僧錄司右講經尋陞右善世時衍斯道主教事洽  
以左遜衍而自居右衍進位少師將化前夕太宗親  
臨視問所欲言惟以洽在患難為對而不及它事洽  
嘗為金剛經注解并有詩集行世

萬金字西白寶積寺僧洪武中住天界與泐季潭等  
奉詔注楞伽金剛心經平生作詩有淡泊齋稿

明心覺源治平寺僧住虎丘有宜晚堂詩集

道岩字魯瞻崑山姜氏子在元出家抗之中竺洪武

庚戌詔為天界書記有詩刻梓名玉峯集

訥無言崑山福嚴寺僧能詩有如幻集

虞畧字道權吳人從聲九臯習天台教觀不樂於名  
相乃逃於禪遂參徑山愚菴及心俾掌藏鑰秩解退  
歸

故山洪武六年出世住吳之延慶次住寶華後歷揚  
州府僧綱司都綱兼住天宮所著松月集行世其格  
韻高遠絕肖唐人

至仁字行中嘗記黃州蘇公祠堂虞文靖公稱之洪  
武初住虎丘有澹居稿

論曰道經之作著自西周釋典之來始于東漢老氏  
教俗為本釋氏出世為宗佛是破惡之方道是興善

之術或和光以明近或曜靈以示遠年踰八百代懸  
數十如舟車均于致遠而有川陸之節若謂其致既  
均其法可換者車可涉川舟可行陸乎昔人謂孔老  
釋迦其人或同觀方設教其道必異信矣崇釋氏者  
曰佛日也道月也儒五星也崇道家者有夷夏之別  
至謂呂望盜陳恒之齊劉季竊王莽之漢二法之辯  
人自楚越鴻常一耳若曰法軫既殊其歸亦異即二  
法之中尚多岐焉高玄皇人之流天真道士一也尹  
軌之例神仙道士二也巢許之比山居道士三也宋  
倫彭謙之匹出家道士四也黃瓊錢鏐之倫在家道

士五也沙門有三坐禪為上輩誦經為中輩助衆為下輩寧特王老濫在釋前而已哉抱朴子曰求仙者要當以忠孝和順仁信為本若德不脩而但務方術不得長生也佛言人事天地鬼神不如孝其二親二親最神也豈惟飛鴻常一實三氏同人矣故在名則反在實則合第東華西夷魚鳥異川另列為方外云勾吳之禪定神異法術詩藻徃徃殊科其尤著者群石首冑于道生僊禽成翮于支遁林授三歸于巨鱗嚮得甘泉于虎跑智瑛齊清安之名印宗悟方外之旨才如貫休皎然藝如法能繼肇不但沙門三輩而



已

贊曰鵠王師子白馬青駕銀流寶殿金構祇園曇花  
乍雨貝葉初翻法鼓所振清梵無喧終超九劫始出  
四門如是往返五十九番將成法器各持一旛山谷  
不響樹子無根雲生碧嶂月落寒源

吳中人物志卷之十二

吳中人物志卷之十三

長洲張景春甫輯

曾孫獻翼論贊

藝術

春秋

區冶子吳人善鑄劍一曰純鉤二曰湛盧三曰豪曹  
四曰魚腸五曰巨闕秦客薛燭善相劍越王取豪曹  
巨闕魚腸示之薛曰非寶劍也取純鉤示之薛曰光  
乎如芙蓉始生取湛盧示之曰善哉允常以湛盧獻  
吳公子光弑吳王僚湛盧乃去

吳

吳泰能筮會稽盧氏失博山香爐使筮之泰曰此質  
雖為金其象實山有樹非林有孔非泉闔閭晨興見  
發青烟此香爐也語其處得之

姚光有火術吳王身臨試之積荻數千束使光坐其  
上又以荻裹之因猛風而燔荻盡光端坐灰中振衣  
而起把書一卷吳王視其書不能解也

三國

皇象字休明廣陵江東人工書羊欣撰能書人名稱  
其書沉着痛快

曹弗興以畫名冠當時時有八絕弗興預焉孫權命  
畫屏誤墨成蠅擁以手彈之又嘗見溪中赤龍罵以  
獻孫皓至宋旱暵取置水傍應時雨足南齊謝赫謂  
弗興之迹去吳未遠殆不可見祕閣之內獨有所畫  
龍頭况後南齊數百歲耶

嚴武字子卿吳人衛尉駿再從子也園棊莫興為軍  
趙達河南人少從漢侍中單甫學九宮一筭之術能  
應機立成問對若神至計飛蝗射無不中或難曰飛  
者固不可校此殆妄耳達使其人取小豆數斗播之  
席上立知其數嘗過故知為之具食且曰倉卒乏酒

又無嘉肴達取盤中隻箸再三縱橫之乃言卿東壁下有美酒一斛鹿肉三斤何以辭無酒肴主者嘆曰以卿善射特相試耳又有書簡上作千萬數著空倉中封之令達筭之達云其數有名無實其精微如此吳主孫權謂其術祕而不出會其死乃發棺竟無所得

吳範字文則會稽上虞人治曆數知名孫權起于東南範委身事之每有灾祥輒推數言多効權在吳欲討黃祖範曰今茲少利不如明年俟軍出行因詣船買催兵急行至即破祖祖方亡範曰未遠必生擒祖

果得之權以範為騎都尉領太史令數從訪問欲知其訣範祕惜其術初權為將軍時範言亥子之間有大福慶權曰若終如言以君為侯及立為吳王範時侍宴曰昔在吳中嘗有盟言大王識之耶權曰有之因呼左右以侯綬授範範知權欲以厭當前言輒不受及後論功行賞封為都亭侯範為人剛直素與魏勝同邑相善勝嘗有罪範訴權至叩頭流血權意釋得免

王蕃吳中常侍廬江人善數術傳劉武乾象曆依其法而制儀立論考度有說

葛衡字思直明達天官能為機巧作渾天使地居于中以機動之天轉而地止以上應晷度

朱景瓌筭術精妙設肆盤門驛貞明中廣陵王錢元璩鎮吳景瓌上書云到仕當三十年安寧元璩命燭焚之謂其說尚遠未之敬也至天福庚子辛丑忽記其事召景瓌問之曰筭數盡矣及期薨

顏規本吳郡玉工廣陵王嘗召術士朱景瓌問筭術遁甲事規適解玉便聽熟聞其說他日質於景瓌遂精其術忠獻王嘗欲享廟規上書言翌日利五鼓之前如寅時則杜門在南不可出入不聽果寅時王車

出南門鑱以鑰壞久不能啓遂破鑰而出由是知其神驗王遂以為軍師

孤城鄭姬能相人與吳範鄭達輩號稱八絕

晉

張弘字敬禮郡人善篆隸飛白書妙絕當世人稱其飄若游雲激如飛電有飛仙舞鶴之態常戴烏巾時號張烏巾歐陽詢謂張烏巾飛白論入妙品小篆亦入能品

張彭祖郡人善隸書王右軍每見其繡牘輒存而玩之



沈嘉字長茂吳郡人官至吳興太守善草書賦云  
長茂草勢既捷而疎慕王不及獨斷所如猶鷙鳥擊  
搏而失中因踉蹌於古墟

宋

顧寶光郡人吳郡太守琛之子大明中為尚書水部  
郎歷官司徒右曹掾書宗高帝行書卓越多奇

褚胤郡人年七歲善碁及長冠絕當代父榮期與臧  
賢同逆胤從誅何尚之謂胤奕碁之妙冠古今因父  
受戮時痛惜之

陸探微吳人善畫事明帝平生多愛寫古聖賢像謂

盡有六法探微得其妙二子綏洪綏肅得家學亦工  
惜不傳唐張彥遠謂體運道舉風力頓挫一點一拂  
動筆新奇固自不凡

梁

范懷約郡人官至東宮侍書其書任已作制無大過  
人武帝謂其真書有力行草無功

顏協字子和郡人學書于懷約藝過其師荆楚碑碣  
多協所書官至湘東王記室

張僧繇吳人嘗于江陵天皇寺柏堂作廬舍佛像及  
仲尼十哲明帝怪問釋寺畫孔聖僧繇曰後當賴此

及廢浮屠氏獨此殿有聖像得不毀又嘗于金陵安樂寺畫四龍不點睛云點之即飛去人以為誕固請點之須臾雷電破柱二龍乘雲去未點睛者尚存寺中又畫天竺二胡僧侯景亂析而為二一為唐右常侍陸堅所寶堅疾夢胡僧來告云我有同侶在洛陽李氏若求合之當以法力助君陸遂往求之劉長卿記其事潤州興國寺若鳩鵲栖梁上穢汙尊像僧繇於東壁畫一鷹西壁畫一鷄皆側首向簷外鳩鵲不敢復入其畫品神妙如此

朱昇字彥和吳郡人居貧以傭書自業寫畢便誦涉

獵文史通雜藝博奕書笑尤善草書

顧光寶郡人時建康陸溉病瘡不療光寶詣溉命筆  
圖一獅子於戶外云旦夕當有驗至夜聞窸窣之聲  
明日視之獅子口血淋漓瘡遂愈人以為神異  
齊

褚思莊以善奕名世琅琊王抗第一品思莊與會稽  
夏赤松第二品夏思速善於大竹思莊思遲巧於闔  
宋文帝時羊玄保為會稽帝遣思莊與玄保戲因製  
局還於帝前覆之齊高帝使思莊與王抗對奕自食  
時至暮一局始竟上倦遣還省至五更方決抗睡於

局後思莊達旦不寐思莊所以品第致高緣其用思  
深久人不能當二人並官給事中

唐

陸柬之吳人官至朝散大夫守太子司諫郎虞世南  
之甥學書舅氏晚擅出藍之譽米氏書史載柬之書  
頭陀寺碑內空山字蓋其父名山才臨書遷避耳

陸彥遠父柬之傳父書法以授甥張旭

張旭字伯高蘇州人官至左率府長史工草書初為  
常熟尉時有老人持牒求判信宿又来旭怒老人曰  
愛公墨妙欲家藏耳因復出其父書旭視之謂天下

奇筆也自是盡其法旭嗜酒大醉呌呼狂走乃下筆  
嘗以髮濡墨作大字既醒自以為神自言初見擔夫  
爭道又聞鼓吹而知筆意及觀公孫大娘舞劍然後  
得其神其名本以顛草而至於小楷行書其草字雖  
奇怪百出而求其源流無一點畫不合規矩者所謂  
顛張不顛也

史惟則字天問工八分飛白二篆在唐以八分名家  
者四人曰韓擇木蔡有鄰李潮與惟則也歷翰林學  
士卒葬吳城下同時有史懷則其書不減惟則初不  
見稱豈其位不顯耶蓋惟則昆季間也

張從申祕書省正字有書名嘗書李含光碑李陽冰題世謂從申書遠近稱善獨步江外兄從師弟從儀從約

孫過庭字虔禮郡人官至率府錄事參軍工書嘗著書譜行于世子翔亦能書

張璪

一作藻

字文通吳郡人官至祠部員外郎善山水

松石嘗撰繪境一篇言畫之要訣畢宏見而異之璪嘗手操雙管一為生枝一為枯枿而四時之行遂驅筆得之故一時號為神品

朱審吳郡人得山水之妙亦能人物竹木

顧生吳士大曆中人以畫游諸侯之門每畫先貼絹  
數十幅於地乃持墨汁及調諸彩色各貯一器使人  
吹角擊鼓百人齊聲噉叫顧生著錦襖錦纏頭飲酒  
半酣繞絹貼走十餘匝取墨汁攤寫絹上次寫諸色  
乃以長巾一頭覆於所寫之處使人坐壓已執巾角  
而曳之迴環既遍然後以筆墨隨勢開決為峯巒島  
嶼之狀夫畫雅淡之事顧生瞑目鼓噪有戰之象其  
畫之妙者乎

石荊山吳人善琴為獨孤台州所知召與之游荊山  
於琴博而熟故重之荊山每操嘗以十合小豆為準



盡一升而移品

姚兼濟得石荊山之傳在楊州逢異人授以琴操撫之聲果奇兼濟固求學焉異人乃授之以清風景雲等五調世所傳廣陵散之遺音也

趙師吳人貞觀中善琴嘗云吳聲清婉若長江廣流綿綿徐徐國士之風今樂府有吳音子夜世俗之樂也

席謙郡人梓州肅明觀道士善碁杜甫詩云席謙不見近彈碁

楊惠之初與吳道子同師學畫見道子藝成惠之恥

為更為塑工為天下第一手故中原多其塑山石  
崑山慧聚寺有毘沙門天王像惠之所塑形模如生  
其傍二侍女尤佳徐稚山嘗紀其事謂此像得塑工  
三昧具戒後人不可妄加脩飾後果為一俗工脩治  
遂失初意

紀朋者吳人也見明皇雜錄云嘗授祕訣于隱士周  
廣觀人顏色便知人深淺言之精詳不待候診

周廣嘗得紀用之學開元中召至京師有宮人每日  
晏則笑歌啼號若狂疾而足不能及地廣曰此必因  
食飽促力復仆於地而然飲以雲母湯令熟寐寐覺

失所苦問之乃言太華公主載誕三日宮中大陳歌  
吹此宮人主謳欲其聲清嘗食狔蹄羹遂飽當選歌  
大曲曲罷覺胸中甚憤戲於砌臺乘高而下未及半  
復為後來者所激因仆地比蘇即病狂自是足不能  
及地又有黃門自交廣使回拜舞殿下廣曰此人腹  
中有蛟龍明當產一子即不可活矣上驚問黃門有  
疾否對曰臣馳馬大庾嶺大熱而渴飲於路傍野水  
今腹中堅痞如石廣以消石雄黃煮飲之吐出物數  
寸其大如指鱗甲備具投之水俄頃數尺遽以舌潤  
沃之復如故形上驚異之欲授以官爵固請還吳中

水部員外郎劉復為廣作傳叙述甚備

五代

羅塞翁隱之子為吳中從事善畫羊精妙卓絕

滕昌祐字勝華吳人後遊蜀以文學從事初不婚宦  
志尚高潔脫略時態工畫花鳥蟬蝶折枝生菜傳彩  
鮮澤宛有生意尤長於畫鵝蓋其觀動植而形於筆  
端未嘗專於師資也

宋

朱億字延平長文之祖邃於琴家有古琴池中書曰  
上元瀆題曰玉磬上元唐肅宗紀年長文著琴史而

書王磬事

毛松峴山人善畫花鳥四時之景子益乾道間畫院待詔益子允昇景定中畫院待詔皆工花鳥能世家學

單邦顯吳郡人學千里希遠畫林木山水不及惟花卉蜂蝶粗可髣髴

李珣吳人善律曆之學紹聖二年曾肇為滁州守命珣為漏壺以順晝夜一郡則之

老戴忘其名吳郡崑山人亦學二趙林木山水追踪大亨衛松花卉謬甚與邦顯相反

畢生文簡公諸孫寓居吳郡工牡丹甚有生意其壻姚亨能傳其業

李成吳人五代末以畫知名宋初衛融知陳州聞其名召之挈家而往

朱象先字景初松陵人善畫馳名元符間子瞻跋其畫有云能文而不求舉善畫而不求售文以達吾心畫以達吾意而已以其不求售也故得之自然

何充秀才姑蘇人能寫貌擅藝東南子瞻嘗贈詩云問君何苦寫我真君言好之聊自適

馮大有文簡公族孫寓家吳門專畫蓮荷精巧入格

趙伯驪字希遠千里弟嘗畫姑蘇天慶觀樣進呈孝  
宗仕至觀察使卒葬吳縣觀音山周益公為神道碑  
子師瓘官至八座

僧妙應俗姓董氏妙於刻石淳熙中居吳之龍興寺  
嘗模廬山翰湏菩提像於寺中其陰作天台五百尊  
者筆法奇古又於虎丘作石觀音像亦佳

張珙吳人妙於刊鐫趙竦為兩浙漕日以重定華夷  
圖方一尺有半其字如蠅頭體製精楷俾珙刊之凡  
三年而後成

袁遇昌吳之木瀆人善塑嬰兒每用泥搏埴一對約

高六七寸者價直三數十緡其衣襦襪積與夫齒唇  
眉髮至於腦頤按之脅脅括動遂昌死不傳其子此  
藝遂絕

祝庶幾郡人通象緯之學累赴不第景德中求試所  
習以為司天靈臺郎

胡舜申紹興間自績溪徙于吳通風土陰陽之術世  
所傳江西地里新法出於舜申嘗以術行四郭而相  
之以為蛇門不當塞作吳門忠告一篇范志備載其  
文

鄭君聘字應求精於相嘗見唐輝子明以手拊其腰



曰異日金琅璫又見顏仲謙謂其地行居官必尚猛然可銀琅璫耳衆未以為然後仲謙守嚴陵頗有郅都之風子明躋法從其言皆驗

滕伯祥生慶元間為人樂善好義遇孤貧之不能婚嫁與喪葬者多為之舉鄉稱為滕佛子嘗出郭遇至人得小兒疳方因以為業今其子孫於吳中尤不替所傳國初尚書德懋之先也

沈良惠以醫仕宋由汴徙吳思陵賜書良惠二字吳人遂因以為稱而當時亡其名矣蓋著于醫者也入元泊本朝其家尤多以醫顯

呂彥直蘇州裱匠之子在三館為胥駙馬王洸留門下使雙勾書帖嘗模黃庭一卷上用所刻勾德元圖書

嚴煥字子父常熟人登紹興第仕終朝奉大夫精於書學

林琰字稚圭長洲人與兄璞乾道中同舉進士琰善篆書

顏直之字方叔長洲人工小篆得秦詛楚文筆意嘗為參政樓鑰書攻媿齋榜鑰賦詩美之著集古篆韻二十卷直之氣貌豐碩善攝生以弓矢應格差監省

倉巧祠主晉仙都觀號樂閒居士子汝勛亦工篆  
丁真一吳郡道士善製墨面云玄中子

王維清製墨面云淨名齋幕云姑蘇山人右二品朱  
元章家所造

元

李世英字伯英長洲人精于書學作韻類三十卷其  
彙集之義以字為本以音為幹以義訓為枝葉自一  
而二井井不紊凡十年而成書從子文仲又本說文  
作字鑑五篇辨證點畫刊除舛謬以脩一家之言于  
文儒黃晉卿為之序

陸友字友仁博雅好古工漢隸八分書尤能鑒辨三代漢魏而下鍾鼎銘刻晉唐法書名畫皆有精識嘗至都下虞奎章柯博士皆善其書言于上未及任用而歸居吳中扁所居曰志雅齋龔璚為銘美其能蓄古圖書而因致其學焉著硯史墨史嘗得衛青古玉印又著印史

錢逵字伯行父良佑以家學有書名逵嘗為江湘行省管勾架閣歷淮南行省員外郎國初選赴京師同太常議禮禮成發鳳陽居住尋歸復以事遣詣京卒繆貞字仲素善篆隸真行書虞山碑刻多貞手蹟尤

嗜古凡三代漢唐器物悉能購藏嘗得宋內藏紹興  
丁巳邵諤所進述古圖圓硯因以述古名堂黃晉卿  
為之記子侃字叔正亦好文

蔣冕字啓端工小篆從游周左丞伯溫之門

顧信字善夫居太倉善筆札從趙文敏公游每得文  
敏書即鑒諸石真一亭中扁曰墨妙文敏為其好學  
樂為之書嘗為杭州軍器局提舉

張遜字仲敏吳郡人畫竹勾勒法妙絕當世山水學  
巨然則不逮竹

顧達吳人畫山水人物兼能寫貌

鄭禧字熙之郡人山水師董源用墨清潤可愛墨竹禽鳥全法趙文敏公

朱玉字君璧崑山人時永嘉王振鵬界畫見稱玉從之游盡得其技至順壬午奉中宮教金圖歲經佛像引首以進方不盈矩曲盡其狀後清寧殿勅畫史圖其壁有以玉薦者而玉老矣所居有虹月樓會稽楊維禎為記

李立吳門人其畫法多徇小李將軍嘗為顧氏作玉山雅集圖行世

謝伯誠任陽人畫法超軼得董北苑之傳嘗作瀑布

圖楊廉夫為品題之

顧安字定之廕授蘭溪巡檢以寫竹馳名嘗任泉州路判官

宋尹文字文璧父海道千戶尹文幼受知于左丞許師敬舉為翰林檢閱官學琴於秋山徐氏父子得其雅正之音大德間魯國長公主聞其名召至為奏胡笳曲稱賞賜金帛鄉晚精六壬遜甲之術多奇中錢中字文則吳人讀書有通敏才雅善琴尤精祿命之說性狷介寄迹委巷不改其樂子紳字孟書

沈繼孫吳中槐市里人游荆楚遇異人授古墨法歸

以幣帛資讀書其有定直酬弗當輒弗與其門落然而  
隱操甚高人莫知其姓字惟稱墨翁云

朱珪字伯盛崑山人師濮陽吳睿大小篆尤善摹刻  
凡吳下碑板多出珪手然非其人珪不屑也又喜為  
刻印章茅山張外史嘉珪錫之名方寸鐵珪嘗取宋  
人王順伯并元趙孟頫吾子行二家印譜吳睿所刻  
印文并附自製私印纂例為書名曰印文集考惜不  
傳所存有名蹟錄蓋其平生所刻名文也性孤潔不  
娶終

謝杞能刻印章元貞間錢翼之有二私印為吾衍所



篆而祀刻之習之特識其名於衍手跡後

朱碧山吳中鉏其製杯盞時稱絕藝

張撥天皇慶間匠者玄妙觀有玉皇閣壞一角脩治

費計千緡觀主募而不克舉一日撥天來謂觀主曰

不須拆動但換一小馱梁添一斗拱而已即登其上

斷下舊梁易以新木架拱條忽如舊一時以為神異

平江王漆匠至正間嘗以牛皮製一舟內外飾以漆

拆卸作數節載至上都游漾於灤河中可容二十人

上都之人未嘗識舟觀者異之又嘗奉旨造混天儀

可以摺疊便於收藏其巧思出人意料可謂智能之

人也仕為管匠提舉

湯通玄太倉人善推陰陽星曆地理之學至正辛卯仲秋丁祭槐上疑米鉦然有聲通玄曰此兵兆也明年方國珍突入婁江杭和卿拒戰而敗居民十餘萬戶皆為所屠有作墓於馬鞍山之顛者通玄曰宜山下坡陀處其勢緩而氣久可葬若山顛則太峻而驟發且白虎據之難為繼世當崇其左為青龍架石而穴之今名為陳家桃源洞是也又樓鍾於上朝夕鳴其左則右不敢動通玄曰其如樓廢何不從其說洪武中樓廢而陳氏滅

譚士元字友文嘉定人術精陰陽判太史局仕至朝散大夫性廉潔雖一時權貴見知未嘗有私請人多賢之士元葬邑之東月浦

陸德潤字仲德崑山人通星曆之學客江西得祕數益推極其說然頗閉匿不輕語人為入簡潔重信義范疇字復初金華人為洞霄宮道士得江西張九牛占神妙莫比有胡某嘗負罪而逃捕者甚嚴即疇門求筮爻成曰可於北方樹木中得之果獲於臨平鎮空楊樹中胡後會赦出持刃扣疇門賺以卜欲害之疇占決知不利於已謂之曰欲問卜可擲下手中刀

其人駭而去由是徙家于蘇設肆於乘魚橋下所叩  
愈驗

王仁美字安之善相能決死生休咎有驗人號為王  
電目雖紫閣麻衣弗能過之

葛應雷字震父吳人攻於醫嘗著醫學會同二十卷  
大抵言世之言醫者執方拘論莫究其源於是推五  
運六氣之標本察陰陽升降之左右以定五臟六腑  
之虛實合夫經絡氣血之流注而知疾病之候死生  
之期其處方劑施砭熅率於他醫異以此名動一時  
時浙西提刑李判官中州名醫也嘗因父有疾能自

診之復咨於應雷聞其言論父子相顧駭愕曰南方  
有此人耶盡出所藏劉守真張潔古書與之討論無  
不脗合而劉張之學行於江南者自此始由平江醫  
學教授陞成全卽江浙官醫提舉子乾孫

乾孫字可父未冠好為擊刺戰陣之術儀狀特偉膂  
力絕人長乃折節讀書領元鄉薦屢試見黜退而淬  
礪古文詞金華黃文獻公奇其文勸之仕不應乃發  
父書讀之曰醫之為技止於是矣夫何粗工之弗察  
也乾孫蓋獨得其傳而治疾多奇驗他醫所不能治  
者以叩乾孫無不隨愈至正十三年鄰郡盜起浙西

僉憲朝鮮李公仲善分治吳下慕乾孫才識武略與  
議事李公壯其言為城守計民賴以安時將召用竟  
寢卒年四十九所著古文詩賦惜皆不傳今所存者  
醫論數篇而已

葛應澤應雷弟亦仕平江路官醫提領子正蒙字仲  
正世其業今葛氏尚居郡中杉瀆橋故第所扁醫室  
曰復生堂其座右之銘曰濟世之道莫大乎醫去疾  
之功莫先乎藥乃周左丞書篆刻猶存

張元善字性之以醫官至保冲大夫江浙官醫提舉  
嘗上疏言國家尊祀三皇為醫設學凡古之神醫若

岐伯鬼臾區等十人配享中殿歷代名醫宜從祀兩廡如孔廟制庶見崇報之道時論譴之元善旁通于儒為錢翼之壻元善卒周左丞銘其墓孫潛字希文永樂初以醫士徵蒞太醫院東還嘗率中貴人出使西南諸國後以壽終于家有三子頤字養正豫字致和復字啓陽皆馳譽當時豫嘗仕為御醫頤終布衣而名尤著者

李可道學醫于黃子久家城東葑門外有林泉高引之志子久嘗畫天池石壁圖畀可道一時名流賦詩可道後以術授黃仲安

倪維德字仲賢先為大梁人徙居吳中世以醫鳴茲  
紹家學而未知適從後得東垣先生之書讀之喜曰  
道在是矣遂有所得乃考証東垣試効方若干卷板  
行于時見諸說之詳於他而獨不及眼疾之科故自  
著一書曰勅山老人原機啓微集東垣之傳殆自此  
爾卒葬于吳陶琛為之銘

劉勉字仲勉世為瘍醫至元間以薦馳傳入朝奏為  
尚醫食太醫祿入侍帷幄出隨扈從被遇特加尋以  
省臺交舉授保冲大夫江浙官醫提舉至 國朝仍  
以名醫召至京師



趙良仕字以德汴人於宋有屬籍再徙浦江嘗試吏  
憲司即棄去從丹溪朱彥脩習醫家言久之治療多  
有奇効一時名動浙西東所著醫學宗旨金匱方衍  
義并述丹溪藥要等書張士誠據吳招致不起挈家  
去浙復來吳占籍長洲以高年終祭酒胡公儼表其  
墓子友恭友同友同仕華亭訓導遂家焉友恭子季  
敷季敷子同魯字與哲有文名

姚良字晉卿明於醫所著尚書孔氏傳律呂會元派  
源指治方論考古針灸面經其七世祖諱爽字景名  
仕宋高宗時有功業卒謚文康爽生杰字士英官至

延京殿學士光祿大夫

林文友字會之先世自閩來吳大父諱茂芝者宋人  
以少室隱廬市間文友早歲留意醫學心存利濟嘗  
名其藥室曰生意堂晚得攝生之術以高壽終子以  
義地爲醫正郎太醫院御醫

葛世字明仲崑山人業醫累世精究內外科又著保  
嬰集奏進宣宗親覽賜宴將勞仕爲迪功郎楚府良  
醫副

王履字安道崑山人博學有文精於醫自謂萬物皆  
備於我非天地不能以備萬物萬物備我者易也易

在我天地亦在我况萬物乎於是作小易賦論仲景  
傷寒為立法之祖後人雖變易無窮終莫能越其矩  
度夫素問謂人傷於寒為病熱者言常而不言變仲  
景謂或寒或熱而不一者備常與變而弗遺也因作  
傷寒立法考又謂六經病證陽明篇無目疼少陽篇  
言胞脇滿而不言痛太陰篇無證噎乾厥陰篇無囊  
縮若此者非皆本無也必有之而脫簡耳以三百九  
十七法內除重複者與無方治者止以有方治而不  
重複者計之得二百三十八條作傷寒三百九十七  
法辨論內外傷經旨異同中風中暑辨議目曰辨經

集摭一卷標題原病式一卷百病鉤玄二十卷醫方  
統一百卷子伯承亦以醫鳴其門人許謹字元孚又  
以學授陶浩字巨源

鄭壬字有林宋華原郡王之裔世在崑山平橋下以  
產科名

沈貞字士怡崑山人業醫志在濟人嘗患傷寒難治  
因以仲景診為主取李浩或問郭雍補亡由漢迄今  
所診若正變類外之証意別本虛之目為書名傷寒  
會通若干卷而謂其補仲景之所未備中書盧傳述  
其行傳于世子方世其業

房伯圭常熟人工於醫其詳見鄭東所為傳

韓復陽其先安陽人諱凝元季來吳以醫起家卒于  
洪武初金華胡仲申誌其墓子二奕字公望有隱操  
以儒而醫諱字公達仕太醫院判奕子伯承世其業  
名盛吳中伯承子克美

徐亨甫元常熟州醫學提舉家于城濠股工整骨科  
子伯脩太醫院醫士孫士深業醫而儒

本朝

宋克字仲溫家郡城南宮里號南宮生高太史季迪  
嘗為之傳稱其少任俠善擊劍走馬及結客與少年

飲博盡喪家貲逮壯見天下亂思自樹立功業去學  
兵將北走中原從豪傑計事會道梗無所合而歸素  
工草隸妙逼鍾王擅稱一時後仕鳳翔府同知  
宋廣字昌裔亦善書與仲溫齊名時稱二宋仕沔陽  
同知錢芹繼忠之婿

馬攷字彥強吳江人善書洪武中嘗受薦不仕

朱士隆崑山人工篆籀嘗積所書筆墨于玉峰山中名  
曰筆塚錢塘王洪希範為之著銘弟士常亦好書

張翥字翔南太倉人善書大字如斗終日揮洒不倦  
蓋其所長也

滕用亨字用衡初名犯國諱乃更今名弱冠隨從父尚書思勉宦遊南北涉歷山川奇瑰益資其學晚歸鄉里將終隱焉永樂三年以善書薦時年七十矣上召見面試篆書作麟鳳龜龍四大字以獻稱旨後再獻貞符三詩特授翰林待詔居官三年卒無嗣壻傳其業

夏泉字仲昭崑山人永樂進士入翰林為庶吉士工楷書上稱其書第一授中書舍人正統初書皇陵碑寵賜甚厚以太常卿致仕尤善寫竹兄曷字孟暘亦以楷法授中書舍人能畫同邑有李寅屈處誠師泉

畫竹

謝克銘太倉人宣德間以草書馳名

沈洪字雄仲長洲人其先世為中吳富室萬三公中  
哀嘗遊京師從陳登習篆時程南雲亦有書名洪又  
從之學凡漢隸八分真行草草皆能書但拘於繩墨  
殊乏風韻偃蹇老於江湖

馬良字子善臨安人來學于吳因家焉自幼巧慧於  
繪事尤精晚移崑山嘗作四天王像於僧寺甚奇特  
見盧公武作傳

朱紳字大章長洲人始祖清字景賢由宋南遷世業



醫傳至紳十五世矣紳出贅滕氏亦以醫名家至紳尤以瘍醫稱子孫能世其業

周孟容嘉定人工寫神見王常宗叙其聚英圖

王賓吳縣木瀆人隱晦不仕嘗於天平山作龍門春曉圖遂知名于繪事

謝譜字孔昭畫山水重疊爛熳千幅不同尋丈之軸不日而成

沈遇字公濟淺絳深色種種能之晚工雪景永樂末嘗召見歸以高年終

蘇復字性初邵人仕綿州知州作畫師盛懋後宦游

歸畫趣盡變舊習然不苟作終歲不能脫一幀殆與  
孔昭遲疾不同矣

史公謹吳人初仕應天府佐落職即返初服以終善  
畫長於寒林雪景

馬軾字敬瞻嘉定人明天文宣德中仕欽天監漏刻  
博士旁精繪事與錢唐戴文進錦衣謝庭循同擅畫  
名于京師

范暹字啓東嘉定人善畫翎毛與張可觀張翬朱士  
謙名于時

陳暹字季昭郡人畫山水人物但有工氣

朱端木瀆人能造錫作為人衣冠脩楚製作奇古不苟為人所致時稱朱象鼻宣德間人

孫近年崑山平橋人精于碁永樂初有雲游道士賣藥來自負能碁與近年奕輒不勝道士驚駭拂袖去姚思善世為儒醫之家思善工製筆名應科

翟祥字君瑞嘉定人宋忠惠公之裔生元季隱於卜入國朝避諱以字行洪武十八年高皇帝謂其

術數精通以符勅命為本縣陰陽訓術嘗撫陰陽諸家精語為書名曰簡易惜今不傳自號希微子宋太史景濂為傳翟氏以四世家學仍其職

周仲高精天文地理之學足跡半天下歷覽山川觀  
陰陽會徵休咎之符所得益深方承平時自錢塘來  
崑山曰天下兵且起吾卜地莫如此善遂居之已而  
錢塘果燬于兵而崑山無恙自是三十餘年仲高之  
術甚盛洪武初郡邑建署以至官宇神祠凡相方定  
位揆日選辰悉出仲高縣令呼文瞻重其術至為畫  
像屬殷奎贊之

沈景暘吳中卜者永樂中太宗驛取至京命午門  
上布卦問英國公征南事占曰大勝之兆明日正午  
當得捷音其時果有飛騎至報生擒黎賊盡得其國

所占一刻不違 太宗大悅賜景賜鈔幣遣還

沈貞吉弟恒吉相城故家皆善繪事生富室志高尚  
工畫金碧山水以公濟為師每賦一詩營一障必累  
月閱歲乃出不可以購取家庭之間自相唱酬僕隸  
悉諳文墨並年八十餘恒吉子周字啓南有隱操與  
吳文定寬史徵士鑑李太僕應禎劉僉憲珏為莫逆  
交被薦不起畫尤冠絕當世

金鬼谷家于郡城中醋庫巷昔嘗有富商談命肆中  
適一貧者負薪而來告曰我四柱適與同何彼富而  
我之貧也鬼谷曰汝雖生於此當於南方千里之外

亦與富者相埒貧者歸告其母母曰汝有姊在閭中  
當往求之他日詣姊家姊亦甚貧不能容姊知鄰舍  
有隙所但一宿必見鬼物致病亡乃便暫宿之貧者  
入夜寢果見鬼物入穴中遂得黃金百鎰上有金鼓  
覆其上貧者得金致富而歸以金鼓報之鬼谷因署  
其門曰吳中名術金鼓傳家

素宗道恬淡無競舉止閒雅嘗遇兩行無疾步好道  
術多所悟解農有居田間為物怪所擾乞宗道符篆  
揭之菱舍得安寢覺而窺其外有黑虎蹲其旁怪遂  
息其行已端厚人目為德士

盛寅字啓東吳江人世居郡中寅少從王仲光學醫  
永樂間授御醫扈從北征 仁宗嗣位命掌太醫院  
賜勅褒嘉 宣宗嘗召見寅夜直應制瑞雪詩及有  
御製之賜弟宏字叔大早與寅齊名永樂宣德間亦  
仕御醫景泰初宮妃患疾宏進藥有效陞宏官乃辭  
奏有父景良謫戍乞恩優免上允之子侑字文理吳  
江醫學訓科

沈玄字以潛少孤以良惠家學馳聲吳中宣德初徵  
入太醫院為醫士院判蔣用文薦玄擢御醫上謂用  
文知人玄尤能詩

錢宗道小方脉專門仕為晉府良醫正以其能大為  
恭王所嘉子良玉生伯常為御醫伯常子鈍亦進用  
為院判

吳誠字純伯常州徙吳高祖櫟堂宋名儒曾祖秀夫  
仕元山陰令至父可大醫行於時誠世其業

王敏字時勉父德廣受醫於伯父仲光敏早孤從學  
於韓伯承然其家學有自故敏中歲即知名尤多治  
効

劉毓字德美少孤鞠於外家徐氏徐故居藥為業遣  
學于盛啓東啓東出王仲光韓復陽而二家本丹溪



毓故得其源委既老方以醫徵得官太醫院

陳公賢字公尚其先從外氏孟景陽小兒科公尚與兄公學世其業初無仕進意朝廷召用天下名醫郡縣以公尚薦未幾乞終養復再召即入御藥房授太醫院御醫進院判致仕卒

劉倫字宗序先汴人占籍長洲曾大父彥敬為良醫大父士賓仕歷院判父原博嘗徵為太醫院吏目有詩名倫隱於市成化間以薦者至京擢官御醫奔母喪歸遂卧不出以高壽終

張收字用軫善琴永樂初少師姚廣孝薦上留侍文

華殿又陳惟成揚師道俱吳人派從松江劉鴻氏之琴

李明善工刻印章能本古制太史王冕為作印說千餘言以遺之

姜振崑山人多巧思嘗得作鹵簿法制大明定鼎將祀南郊遣中貴訪得之制作中度總領群匠造諸身殿多稱旨錫衣一襲仍給冠帶終身又蒯璫香山人亦以匠鳴于時

論曰中世習為內學尚奇文貴異數代不乏于時通儒往往忿其不經謂宜藏擯豈以公孫勝之占夢不

如太宰嚭哉亦以范疇神于占易不若向平之知損益耳聖人設教開末而抑其端曲詞以章其義其徒亦有推變尤長可以弘補時事陶措紳藻心性衛生娛志班班名家時有可聞者焉漢武好方術光武信讖言士之赴趣時宜者皆馳騁穿鑿多談之懷挾道藝之士莫不負策抵掌順風而屈矣馬遷云使人拘而多忌蓋為此也若吳稱多士書若張旭孫過庭盡若陸探微李成基若嚴武褚胤斯深于才技者乎至陰陽以正時日則有趙達吳範卜筮以決嫌疑則有吳泰王蕃醫方以養性命則紀朋周廣音律以節哀

樂則姚蕪濟宋尹文相術以辯貴賤則鄭君聘王仁  
美技巧以利器用則朱端蒯轡凡此諸君殊才絕藝  
通靈入妙皆一郡之選情迹殊雜難為條品片辭特  
趣不足區別故摠為藝術篇雖曰泥遠存之可也  
贊曰陰陽為宗玄妙非一怪牒神經金繩玉策師曠  
之書箕子之術弘道濟時隱身利物龍則乘雲蠅由  
誤墨槃撰丹青弘蕪飛白異數奇文班班可述